

«Il marchà serra ospidals»

Ospidals sun eir intrapraisas chi ston render per pudair gnir mantgnüdas. Quant affar cumporta il sector da sandà? A quista dumonda s'ha dedichà il schef-meidi Joachim Koppenberg d'urant ün referat a Scuol l'eivna passada.

Fadrina Hofmann Estrada

Joachim Koppenberg es daspö 2007 directer da l'Ospidal d'Engiadina Bassa. «Eu sun però amo adüna per 70 pertschient meidi», disch il schef-meidi da l'anestesiologia. El es dimena d'üna vart respunsabel pella gestiun da l'ospidal, da l'otra vart til staja a cour cha'l paziaint survegna il meglider trattamaint pussibel. Quia cumainza tenor Joachim Koppenberg il spagat: la medicina dess esser orientada tenor criteris da l'etica, mo ils cuosts dessan restar bass. «I va pella dumonda: Che marchanzia es la sandà?», ha mania il referent.

Sandà nun es marchanzia

La sandà nun es üna marchanzia sco pan e lat, dimpersè plütost üna marchanzia sco la sgürezza. I'l sector da sandà es la dumonda dals cuosts fich actuala. Per illustrar la situaziun difficila i'ls ospidals ha manà Joachim Koppenberg l'exaimpel dals pumpiers: Schi arda üna chasa vegnan ils pumpiers e ningün nu dumonda in quel mumaint quant cha quai cuosta. «Avant cha nus fain la dumonda: Faina las chosas inandret?, stuessna dumandar: Faina las drettas chosas?», es il directer da l'Ospidal da l'avis. In seis referat ha'l provà da sensibilisar als preschaints pella difficultà da trattar la sandà sco üna marchanzia.

Il paziaint nun es ün cliaint, dimpersè üna persuna cun temmas e pissers. «Sandà nu's poja cumprar sün ün marchà, be la sporta per guarir», manaja Koppenberg. Tenor el nun es quista sporta amo madüra per ün marchà liber. Las reglas per ün tal marchà nu sun amo fixadas ne da la società ne da la politica.

Be ospidals cun cifras nairas sun buns ospidals

«Intant cha la dumonda che cha la società voul nun es sclerida, daja il privel cha la medicina vegna desdrütta tanter marchà e l'incumbenza da guarir», disch Joachim Koppenberg. Il privel dal pensar economic es tenor il meidi quel cha l'economia pudess d'vantar centrala. Concret vules quai dir cha be amo ospidals cun cifras nairas füssan buns ospidals. Pitschens ospidals cun damain paziaints füssan periclitats. «Il problem es ch'adüna damain persunas lavuran directamaing pro'l let dal paziaint», ha spiegà Koppenberg. Dal 2012 vain introdütta la nouva finanziaziun d'ospidal. Quella vain reglada sur «Swiss DRG's». I's tratta d'ün sistem oriundamaing da l'Australia chi'd es gnü introdüt fingià in Germania. «In quels pajais vain quist sistem darcheu aboli perquai ch'el nu funcziuna, e nus til introdüain uossa», ha dit il referent. Il chantun lavura fingià daspö 2005 cun üna finanziaziun d'ospidal sur DRG's (Diagnosis Related Groups). Quist nov instrument da scumpartiziun da raps funcziuna tenor trais criteris: üna pauschala da 9200 francs per cas, il grà dal cas ed il nomer da paziaints. L'idea es buna, raps daja be tenor prestaziun e quellas d'vaintan plü bunmarchadas pervi da megliders process. «Teoria grischa», ha mania Koppenberg. El disch cha la realtä

guarda oura otra.

Qualità impè da quantità

«Il marchà serra ospidals», es Joachim Koppenberg persvas. Ils ospidals survegnan ün tschert büdschè e ston lura gnir oura cun quels raps. Quai chaschuna üna dependenza existenziala e, sco cha cas in Germania muossan, svilups illa fosa direzziun. «L'esperienza ha muossà cha'ls cuosts i'l sector da sandà creschan inavant e quai impustüt ill'administraziun», ha dit il directer. Diagnosas fosas capitan per mancanza da con-



Joachim Koppenberg s'ingascha sco meidi e directer da l'Ospidal d'Engiadina Bassa per qualità illa medicina. fotografia: F. Hofmann Estrada

trolla e dandettamaing d'vaintan ils paziaints sül palperi plü amalats perquai chi dà lura daplü raps. Tenor Koppenberg vegnan ils paziaints redots al grà dal cas, la chüra vain dimnuida da maniera massiva e la mortalità crescha per 25 pertschient. «L'argumaint chi d'vainta plü bunmarchà nu vala per mai plü», ha mania il referent ed agiunt: «I nu va per quantità, dimpersè per qualità». El es persvas chi dess avuonda mezs finanziais i'l sector da la sandà, mo chi füss da meglidar ed optimar il scumpart. A man da l'Ospidal d'Engiadina Bassa ha'l provà da demuossar chi detta eir pitschens ospidals chi mettan l'uman i'l center e chi prouvan da s-chaffir fiduzcha cun cumpetenza medicinica e trasparenza. Ils cuosts administrativs vegnan tenor el reglat cul Center da sandà Engiadina Bassa da maniera optimala. «L'Ospidal es preparà pel marchà grazcha a la qualità e'ls cuosts bass», es Koppenberg persvas.

Amis da l'Ospidal tscherchan president

(fh) A la tschinchavla radunanza generala dad «Amias ed amis da l'Ospidal d'Engiadina Bassa» han demischünà in gövgia passada trais da tschinch commembers. Alesch Vital (president), Robert Ganzoni (actuar) ed Eugen Jenal (chaschier) faivan part da la suprastanza insembel cun Ida Zisler ed Annina Mengiardi chi restan amo in suprastanza. Bartel Demonti da Zernez ed Urs Trottmann da Scuol sun gnüts elets unanimamaing sco novs suprastants. Il post vacant dal president nun ha vulgü surtour ningün. La suprastanza veglia e la suprastanza nouva s'inscuntran prosmaing per chattar üna soluziun.